

2 Petoro

Petoroŋe ekap betŋan kulemguop.

1 ¹O bukulpne,
Nâmâ Simon Petoro. Yesu Kiristoŋe aposolo âi sâm nihimu mem hoŋ bawaŋgim manmâ gan. Anitâŋe Yesu Kiristohât aposololipŋe nengât biwinenŋe mem hewewej tuhumu Kiristohâlen biwinenŋaŋe kepeim manmain. Otmu yakât dopŋeâk yeŋgât biwiyeŋe mem hewewej tuhumu yâkâlen biwiyeŋaŋe kepeim manmai. Anitâ yet Yesu Kiristo dopyetŋe konohâk. Yakât otmâ Kiristoŋe lohimbi âlâhât nâŋgâmu yahatmu âlâhât nâŋgâmu gemu yawu ki otmap. Yâkŋe lohimbi hârok ârândâŋâk wawaenenekmap.

²Awoŋnenŋe Anitâ otmu Kutdânenŋe Yesu Kiristoŋe eŋgatyetŋeâk otmâ nâŋgâyîŋgim tihityeŋe otmawot. Yawu otmawot yakât yâk yetgâlen biwiyeŋaŋe kepeim denyetŋe lâum manmâ gai. Otmu yawuâk torokatmâ manŋetâ biwi nâŋgân nâŋgânyeŋaŋe kepeiakmâ konohâk otmâ sânduk sâm yâhâwuapgât nâŋgâm Anitâ ulitgum gaman.

Kiristohâlen biwinenŋaŋe kepeim kârihem mannom.

³⁻⁴Anitâ yahat yahatŋe, Wâtgât Amboŋaŋe menenekmâ ikŋe laŋŋan katnenekmu orowâk mannomgât pat kuningiop. Yakât otmâ Yesu Kiristoŋe âwurem ge menenekmâ himbimân yâhâ manman âilonŋoân katnenekmu mannom. Yakât nâŋgâmunŋe âlâ kândâkdâ otmap. Otmu nenŋe yâkâlen biwinenŋaŋe kepeim tem lâuwawŋgim manmunŋe mâmâŋe otningimu târârâhâk manmain. Otmu yawuâk torokatmâ manmâ yâhâmunŋe nenekmu ârândâŋ otmu Kiristoŋe âwurem ge menenekbuap. Sâp yan Hiliwaho Hiliwaho Amboŋaŋe âlâkuâk biwinenŋan kioŋmu ekŋâleangim otmâ hilipgunomgât dop ki tetewuap. Yawu otmâ Anitâŋe mem koko salek tuhunenekmu yetŋe orowâk Kiristo orop biwinenŋaŋe kepeiakmâ konohâk otmu manman âilonŋoân manmâ yâhâmbisâin. ⁵Yakât nâŋgâm

Kiristohâlen biwiyenaje tiŋâk kepeim manmanyenje kelihakmu kârihem mannomai. Yawu manŋetâ wuân me wuân teteŋgiwuap yan girawu otŋetâ Anitâŋe yekmu ârândâŋ otbuapgât nâŋgâŋetâ keterakyiŋgiwuap. ⁶Otmu nâŋgâŋetâ keterakyiŋgiwuap yakât kakŋan otŋetâ bâlemapgât biwiyenje galemahom mannomai. Yawu manŋetâ lohimbî belângen manmaiŋe senyenjan genomai me otmain yawuâk otŋet sâŋ engatyenjan genomai. Yawu otŋetâ Kiristohâlen biwiyenaje tiŋâk kepeim Anitâhât tem lâuwangim uwawapŋe bia manmâ ki lohotŋe otnomai. ⁷Yawu otmâ Kiristohât lohimbî orop biwiyenaje kepeiakmâ konohâk otmu tânahom mannomai. Otmu lohimbî kerek buku otyiŋgim manmâ yâhânomai. ⁸Den sâŋ aran yu tâŋ tâŋâk watmâ Kiristohât tem lâuwangijetâ manman âlepŋahât bulâŋe topŋe topŋe yengâlen tetem henŋenŋuwuap. Yawu otmu Kutdânenŋe Yesu Kiristohât biwiŋan girawu tatmap ya nâŋgânomai. ⁹Yâhâ Kiristoŋe tosayeŋahât otmâ mumu Anitâŋe tosayeŋe pilâyŋgiop yakât ikŋe lohimbî nombotŋenje biwi nâŋgân nâŋgânyenje maŋguakmu gulip malap manmai. Yawu manmâ den sâŋ aran yu nâŋgâŋetâ gemu bet pilâm girawu manŋetâ Anitâŋe yekmu ârândâŋ otbuap yakât ki nâŋgâm manmai.

¹⁰Yâhâ yenâmâ Anitâŋe dâiyekmu Wâtŋât mâmâŋahât Heakŋe mem hewewenŋe tuhuyekmu yâkâlen biwiyenje katŋetâ nine nanne baratne sâŋ meyekmâ manman kârikŋahât pat kuyiŋgiop. Pat yakât bulâŋe biatyŋgimapgât yâkâlen biwiyenaje tiŋâk kepeim yu ya otŋetgât den ekyongoan yu watmâ manmâ yâhânomai. Yawu manmâ ki otmâ tâpikgum Kiristohât mâtâp pilâm mâtâp bâlenjan arinomai. ¹¹Otmu sâp patoen Anitâŋe biwiyenje ekmâ matŋe kâpekyiŋgiwuap yan Kutdânenŋe Yesu Kiristoŋe âwurem ge sârereyekmu Anitâŋe manman kârikŋan katyekmu heronŋe kakŋan manmâ yâhâmbisâi.

Petoroŋe mum pilâyekbuapgât sâop.

¹²Den ekyongoan yu emelâk aposololipŋe lok nombotŋe orop yen kâsikum yiŋgimunŋe nâŋgâŋetâ bulâŋe otmu biwiyenjan katmâ nâŋgâm gai ya nanŋan. Yawu gârâmâ den yu nâŋgâm mem mete tuhum mannomaihât ekyongom yâhâwom. ¹³⁻¹⁴Aiop sâp ki kâlep otmuâk mum pilâyekbom yakât emelâk Kutdânenŋe Yesu Kiristoŋe eknohop. Yakât otmâ inânjan den ekyongoan yu nâŋgâm biwiyenjan katmâ nâŋgâmâk manŋetgât biwiyenjan kionŋmâ yâhâwom. Yakât nâŋgâmune ârândâŋ otmap. ¹⁵Otmu pilâyekbom yakât kakŋan den kulemgum katyiŋgian yu sâlikum nâŋgâm mem mete tuhum mannomai.

Anitâŋe Yesu kun kundenŋe mem âlâ tuhumu ekbi yakât Petoroŋe sâop.

¹⁶Kutdânenŋe Yesu Kiristoŋe âwurem gewuap yan wâtŋe pato tetemu ekmunŋe âlâ kândâkdâ otbuap yakât den emelâk kâsikum yiŋgiwin.

Den kâsikum yingiwîn yamâ loggât nângân nângân ki watmâ den golâ kâsikum yingiwîn. Nenŋe yâk orop manmâ yâkŋe olop miop ya ekmunŋe âlâ kândâkdâ otmu Anitâ orop dopyetŋe konohâk oap yawu nângâwîn. 17-18 Nenŋe yâk orowâk pumŋe âlâen yâhâwîn yan âwâŋe Anitâŋe yâkât nângâmu yahatmu kulem âlâ yuwu memu ekmunŋe âlâ kândâkdâ olop. Anitâŋe Kiristohât kun kundenŋe mem âlâ tuhumu senŋaŋe emetsenŋe pilâmu irik irik sâmap yawuya tetemu ekbin. Otmu sângumŋaŋeâmâ kaok bolaŋ bolaŋ otmu ekbin. Yawu otmu Anitâ yahat yahatŋe, Laŋinŋahât Ambonaŋe yuwu sâop. “Bulâŋanâk yuâmâ nine nanne ombe bisine. Nâŋe biwinaŋe yâkâlâk nângâman.” Anitâŋe himbimâmbâ den yawu sâmu nângâwîn.

¹⁹Otmu embânân emet inânŋan Anitâŋe poropetelipŋe den âlâlâ ekyongomu kulemguwi yakât bulâŋe tetewuap nângâm eŋgat yâhâp ki otmain. Otmu yeŋe gurâ Anitâhât den tâŋ tâŋâk watnomaihât nângâm den âlâen hâum sâmune nângâŋet. Kapi âlâen arine sâm otmâ omoŋdâŋe lambe saum ya laŋinŋan mâtâp ekmâ arimain. Yâhâ emet haŋ sâwe sâm otmap yanâmâ pitu kâmŋe papato yaŋe tetemap. Yawu tetemu tatmâ yaŋak emet haŋ sâmu emetsenŋe ga takamap. Yakât dopŋeâk Kiristoŋe ki âwurem gemu mansain sâp yuâmâ Anitâhât den sâlikum nângâmunŋe haŋ sâningimu Kiristohât mâtâp watmâ yâhânom. Yâhâ âwurem gewuap yanâmâ ikŋe laŋinŋaŋe biwi nângân nângânnenŋan pilâmu Anitâ yet Kiristo yetgât biwiyetŋan âlâlâ tatmap ya topŋambâek nângânom. ²⁰⁻²¹Emelâk emet inânŋan Anitâhât poropetelipŋaŋe yâkât den kulemguwi yamâ yeŋe nângân nângân ki watmâ den ya kulemguwi. Wâtgât mâmâŋahât Heakŋe Anitâhât den biwiyenŋan katmu ya kulemguwi. Yakât otmâ lohimbî âlâ me âlâŋe yeŋe eŋgatyeneâk otmâ den ya sâm kusânâ bukulipyenŋe ekyongonomaihât dop âlâ ki tap. Den yan yu biwiyenŋan katmâ nângâm mannomai.

Lok perâkŋe yengât sâop.

2 ¹Emelâk Anitâhât poropetelipŋaŋe yâkât den Isirae lohimbî ekyongominiwi. Sâp yan lok perâkŋaŋe oain sâm oain sâm otmâ den perâkŋe kâityongominiwi. Yakât dopŋeâk lok perâkŋaŋe yengâlen taka Kiristohât den kelaŋgatmâ kâsikum yinginomai. Yâhâ Kiristoŋe yeŋe tosaŋhât otmâ kaweyenŋan kinmu kuŋetâ muop yakât nângâŋetâ tâŋât otmu betgumai. Yakât otmâ hiliwahonomaihât pat mansai. ²Otmu Kiristohât den kelaŋgatmâ kâsikum yinginetâ nângâŋetâ bulâŋe otmu lohimbî dondâŋe hioŋakmâ yâk yengâlen torokatnomai. Yâk yengâlen torokatnomai yan lohimbî belâŋgen manmaiŋe manmanyenŋe ekmâ sâm ge katyekmâ Kiristohât den pat nângâŋetâ gewuap. ³Lok perâkŋaŋe yengât iri sikumyeŋe ekŋâlem meyingine sâm den golâ ekyongonetâ nângâŋetâ bulâŋe otmu tewetsenŋe yinginomai. Yawu otyinginomai

yakât matŋe umatŋe yingimu menomaihât Anitâŋe sâp kalop. Sâp kalop ya ekmu ârândân otmu matŋe yingimu mem hiliwahonomai.

⁴Bulânânâk Anitâŋe matŋe umatŋe yingimu menomai yakât yuwu sâmune nâŋgâŋet. Kândikum emelâk aŋelo nombotŋaŋe Anitâhât den kum otmâ hilipguwi yakât matŋe nâpumân panyekmu ge omoŋ kâlehen tatmâ gai. Yawu tatmâ yâhâŋetâ sâp pato tetewuap yan den sâm hâreyingim matŋe umatŋe yingimu mem hiliwahonomai. ⁵Otmu emelâk embânân lohimbine Anitâ betgum orotmeme bâleŋe otmâ manminiwi. Yawu otmâ manŋetâ lok âlâ, kutŋe Noa sâm, lohimbine Anitâhât den lâum manŋetâ yekmu ârândân olâk sâm yâkŋe girem den ekyongominiop. Otmu girem den ya ekyongomu nâŋgâŋetâ helekŋe otmu orotmeme bâleŋe tâtâem otŋetâ yaŋak Anitâŋe nâŋgâmu toŋgelâk giop. Toŋgelâk gemu to niŋ niŋ sâm lohimbine bâleŋe ya asisihâk haranyongop. Yâhâ lohimbine nombolân yâhâp Noa orop waŋgaen yâhâ tatbi yawuâk hâmeyeŋe kinop.

⁶Otmu kapi yâhâp, kutyetŋe Sotom yet Gomora, ya ambolipŋaŋe gurâ Anitâhât hâkân otmâ orotmeme bâleŋe otminiwi yakât matŋeâmâ kâlâpŋe ge sem gulip tuhuyehop. Ya yengât den pat nâŋgâmunŋe tetemap yan lohimbine orotmeme bâleŋe otmai yakât Anitâŋe matŋe yingimu menomai nâŋgâm engat yâhâp ki otmain. ⁷⁻⁸Kâlâpŋe Sotom otmu Gomora kapi ambolipŋe sem gulip tuhuyehop yan Anitâŋe lok âlâ, kutŋe Lot sâm, yâkât nâŋgâwaŋgimu hâmeŋe kinop yakât yuwu sâmune nâŋgâŋet. Lotŋe Anitâhât tem lâuwaŋgim orotmeme âlepŋeâk otminiop yakât ekmu ârândân olop. Yâhâ kapi ambolipŋaŋeâmâ Anitâhât den kum den bâleŋe sahaŋgim orotmeme bâleŋe hilâm ârândânâk otŋetâ Lotŋe yekmu tepŋe dondâ bâleminiop. Yawu manopgât otmâ Anitâŋe nâŋgâwaŋgimu hâmeŋe kinop.

⁹⁻¹⁰Yakât dopŋeâk lohimbine Anitâhât tem lâuwaŋgim manmaiŋe manman bâleŋahât paŋgoŋân kioŋmaihât meyekmâ manman âlepŋan katyekmu manmai. Yâhâ lohimbine Anitâhât den kum yeŋe engatyeneâk watmâ orotmeme bâleŋe ekŋâlem otmai yakât matŋe umatŋe sâp patoen yingimu menomai. Yakât otmâ hiliwahonomaihât pat kuyingimu mansai.

Lok perâkŋe ya yengât wâtyeŋe pato ki tatyŋgiap. Yawu gârâmâ yeŋahât nâŋgâŋetâ yahatmu Anitâhât aŋelolipŋe ikŋe orop himbimân tatmai ya yengât nâŋgâŋetâ gemu sâm bâleyingimai. Yawu otmâ aŋelo yaŋe matŋe ningimai sâm yakât ki gorâyŋgimâp. ¹¹Yâhâ Anitâhât aŋelolipŋe ya yengât wâtyeŋe pato tatyŋgiap. Yawu tatyŋgiap yamâ yâkât senŋan kinmai yan aŋelo bukulipyeŋe nombotŋaŋe otmâ hilipguŋetâ Anitâŋe betyongomu tatmai ya yengât ki sâm bâleyingimai.

¹²Yâhâ lok perâkŋe ya yengât topyeŋe yuwu sâmune nâŋgâŋet. Anitâŋe soŋgo bau otmu nâi seloŋ topŋe topŋe katmu ekmain yamâ umut biwiyeŋe bia. Otmu nenŋe hat ari kum taka um nenomgât sâm

kalop. Yâhâ lok perâkŋaŋe yu yakât topŋe nâŋgâm pâpgum ihilâk sâm bâlemai. Yakât otmâ yekmunŋe biwiyeŋe bia mansai yawu otmap. Otmu songo bau kumain yakât dopŋeâk sâp patoen Anitâŋe lohimbi perâkŋe ya hilipyongowuap. ¹³Yâkŋe lohimbi hâhiwin yingŋetâ umatŋe kakŋan manmâ gai. Yakât matŋe sâp patoen Anitâŋe yeŋe gurâ yawuâk hâhiwin yingŋimu umatŋe kakŋan mannomai. Otmu yâkŋe yuwu otŋetâ dondâ bâlemap. Lohimbi senyeŋan kinmâ yu ya ekŋâlem otnehâlâk nâŋgâm otmâ hilipgumai. Otmu yen menduhuakmâ sot nemai yan yengâlen torokatmâ to kârikŋe nem biwiyeŋe hâlim otmu otŋetâ bâlemu anun yingŋimai. ¹⁴Otmu imbi âlâ me âlâ yekmai yan ya yengât nâŋgâm biwiyeŋaŋe otmâ tâpikgum tosa memai. Otmu orotmeme bâleŋe ya ekŋâlem otnehâlâk nâŋgâmai. Otmu lohimbi nombotŋaŋe biwi yâhâp manmai ya yengât engatyenŋan geŋetâ otmâ tâpikgumai. Bukulipyenŋe yengât iri sikumyeŋe miaknehâlâk nâŋgâm mem lohotŋe tuhuyekmai. Yakât otmâ Anitâŋe matŋe umatŋe yingŋimu menomaihât pat kuyingŋimu mansai.

¹⁵Yâkŋe Kiristohât mâtâp bulâŋe ya pilâm lok âlâ, kutŋe Bileam, Beoro nanŋe, yâkŋe olop yawuâk otmai. Yakât yuwu sâmune nâŋgâŋet. Bileamŋe hâmeŋe membom nâŋgâm Isirae lohimbi sait kakyenŋan pilâwe sâm ariop. ¹⁶Arimu Anitâhât aŋelo âlâŋe Bileamgât donŋi lauŋe mem purik pilâwangŋimu amboŋe den ekuop. Den ekumu nâŋgân nâŋgânŋe keterakbangŋimu sait kakyenŋan ki pilâop. Yawu.

¹⁷To senŋe saŋ kititiŋ sâmap yapâ to ki osomain. Otmu elem kârikŋe mem emet mem maŋgumap yamâ gelâk ki gemap. Yakât dopŋeâk lohimbŋe lok perâkŋe yengât denyenŋe nâŋgâŋetâ den yaŋe buku ki meyingŋimap. Yakât otmâ sâp patoen Anitâŋe lok perâkŋe ya pilâyekmu yaehen ge omoŋ bâleŋaŋe sâhâyekmu tatnomai. ¹⁸Yâkŋe yeŋahât nâŋgâŋetâ yahatmu nâŋgân nâŋgân tâŋât lohimbi kâsikum yingŋimai yakât yâkŋe nâŋgâŋetâ yahatmap. Otmu lohimbi nombotŋaŋe pâku lohimbi yengâlembâ dâiakmâ Kiristohâlen biwiyeŋe katŋetâ sâp ki kâlep oap. ¹⁹Lohimbi yawuya yengât engatyenŋan ge lok perâkŋaŋe yuwu sâm ekyongomai. “Kiristone girem den yapâek holaŋnenekmu engatnenŋeâk watmâ yu ya otmâ mannomgât dop tap.” Yawu sâm engatyenŋan geŋetâ orowâk otmâ tâpikgumai. Yawu otmâ Manman Bâleŋe Amboŋahât paŋgoŋân yâhâpŋe kioŋmâ yâkât amutgen manmai. ²⁰Yakât yuwu sâmune nâŋgâŋet. Lohimbŋe orotmeme bâleŋe bet pilâm Kutdânenŋe Yesu Kiristohâlen biwiyeŋaŋe kepeiŋetâ manman bâleŋahât paŋgoŋâmbâ holaŋyekmâ tihityenŋe otmap. Yawu gârâmâ orotmeme bâleŋe bet pilâwi ya miwirikum Manman Bâleŋe Amboŋahât paŋgoŋân âlâkuâk kioŋmâ yâkât amutgen mannomai yanâmâ hiliwahonomaihât pat mannomai. Yawu mannomai yanâmâ emelâk Kiristohâlen biwiyeŋaŋe ki kepeiwi sâp yan tosayaŋahât matŋe menomai sâop ya wangim Anitâŋe matŋe

amokŋan yingimu menomai. ²¹Lohimbi nombotŋaje girawu manŋetâ Anitâŋe yekmu ârândâŋ otbuap yakât topŋe pâpgum orotmeme bâleŋe tâtâemâk otmâ belâŋgen manmai. Lohimbi yawu yamâ Anitâŋe matŋe yingimu menomai. Yâhâ lohimbi nombotŋe âlâŋeâmâ Kiristohât den nâŋgâŋetâ bulâŋe otmu yâkâlen biwiyenâŋe kepeim manmai. Yawu otmai yakât kakŋan yâkât nâŋgâŋetâ gemu orotmeme bâleŋe miwirikum Kiristo betgunomai. Yawu otnomai yâhâmâ sâp patoen Anitâŋe lohimbi belâŋgen manmai matŋe yingimu menomai ya wangim matŋe amokŋan yingimu menomai. ²²Kiristo betgumai ya yengât nâŋgâm den âlâen hâum sâmain yakât nâŋgâmune bulâŋe oap. Den yamâ yuwu tap. Sosonŋe mohatmap yamâ benŋe yâhâpŋe nemap. Otmu bauŋe bokosohân dakakmap. Dakakmu hâkŋe bokosohâk pato otmap ya hârâŋ sâm bererek sâm gemu âlâkuâk ari bokosohân dakakmap. Yakât dopŋeâk lohimbi orotmeme bâleŋe angoân otbi ya miwirikum otŋetâ dondâ bâlemap.

Bulâŋanâk Kiristoŋe âwurem ge menenekbuap.

3 ¹Bukulipne, yuwu sâmune nâŋgâŋet. Yeŋe girawu manŋetâ Anitâŋe yekmu ârândâŋ otbuap yakât topŋe emelâk kâsikum yingimune nâŋgâwi. Otmu yeŋe den ya nâŋgâm biwiyenân katmâ galemahom târârâhâk manŋetgât pepa âlâ kulemgum katyingimune ekbi. Otmu yâhâpŋe yu kulemgum katyingian. ²Emelâk Anitâŋe ikŋe poropetelipŋe den ekyongomu kulemguwi. Otmu Kutdânenŋe Yesu Kiristo tihitnenŋe otmapŋe nen ikŋe aposololipŋe den eknongomu kâsikum yingimunŋe nanŋai. Den ya kerehâk nâŋgâm hengenŋum biwiyenân katmâ manmâ yâhânomaihât yuwu sâmune nâŋgâŋet. ³Sâp pato tâlâhuwuap yan lohimbi nombotŋaje yeŋe enŋatyeneâk watmâ yu ya ekŋâlem otmâ hilipgunomai. Yawu manmâ Kiristoŋe âwurem ge menenekbuapgât sâop den yakât nâŋgâŋetâ bulâŋe bia otmu yuwu sâm yengât senyenân genomai. ⁴“Kiristoŋe “Âwurem ge meyekbom,” sâop yamâ nenŋe ki eksain. Wosan taka tap ya sâŋetâ ari ekne. Anitâŋe hân himbim kândikyotgowâmbâek lohimbi nengât manmannenŋe dop konohâk tatmâ gamap. Otmu tâmbâlipnenŋe mum gara gara otbi yawuâk nen gurâ mumain.” Yawu sâm senyenân genomai. ⁵Yawu sâm senyenân genomai yan Anitâhât den nâŋgâŋetâ gemu yeŋe nâŋgân nâŋgân watmâ sânomai. Yakât yuwu sâmune nâŋgâŋet. Kândikum emelâk topŋe katmâ Anitâŋe sâmu biaembâ hân himbim teteop. Otmu saru keterakmu hân teteop. Otmu elem kulewoŋboŋ tetem yapâek gelâk gemap. Gelâk gemu yanak nak me senŋe âlâlâ topŋe topŋe tetem âi omoŋ omoŋ otmâ yahatmap. ⁶Otmu lohimbiŋe Anitâ betgum otŋetâ bâleop yakât matŋe yâkŋe sâmu toŋgelâk gemu to niŋ niŋ sâm lohimbi otmu senŋe âlâlâ wanŋaen ki yâhâwi ya aksisihâk haranyongop. ⁷Otmu sâp pato tetewuawân Anitâŋe sâmu hân himbim ekmain yu kâlâpŋe sem gulip tuhuwuapgât sâm

kalop. Sâp yan Anitâŋe lohimbi kerek nengât biwinnenŋe ekmâ sâŋ hâreningiwuap. Yawu otmâ lohimbiŋe yâkâlen biwiyenŋe ki kepeimai yamâ matŋe yingimu mem hiliwahonomai.

⁸⁻⁹Otmu lohimbi nombotŋaŋe “Wongât Anitâŋe Kiristo in yawu ki hâŋgângumu âwurem gemap?” yawu sâmai yakât yuwu sâmune nâŋgâm biwiyenŋan katŋet. Anitâŋe sâpŋât ki nâŋgâmap. Yakât otmâ yambu 1,000 yakât biwiŋan yu ya tetemap yakât nâŋgâmu hilâm konok biwiŋan tetemap yawu otmap. Yamâ aŋgoânâmâ lohimbiŋe orotmeme bâleŋe bet pilâm Kiristohâlen biwiyenŋe katŋetâ manman kârikŋahât pat kuyingimu manŋetgât nâŋgâm mambotyingimap.

¹⁰Kutdânenŋe âwurem gewuap yakât nâŋgâŋetâ keterakyiŋgiâkgât den âlâen hâum sâmune nâŋgâŋet. Kapi ambolipŋe yengât kasalipyenŋe sâp girawuân taka itit kiom tuhuyiŋginomai ya ki ekyongomai. Kapi ambolipŋaŋe ki nâŋgâmâk manŋetâ kasalipyenŋe pârâk sânsânâk taka yongom kiom tuhuyiŋgimai. Yakât dopŋeâk Kiristoŋe pârâk sânsânâk gewuap. Sâp yan kâlâp punduŋ sâŋ himbimân emetsenŋe pitu âlâlâ ya kerehâk munŋe orowâk sem gulip tuhuwuap. Otmu hânân yu senŋe âlâlâ topŋe topŋe yu gurâ yawuâk sem gulip tuhuwuap. ¹¹Yakât nâŋgâm yeŋe manman bâleŋambâ keterakmâ Anitâhât tem lâuwangim târârâhâk mannomai. ¹²⁻¹³Otmu Anitâŋe sâmu kâlâp pato punduŋ sâŋ himbimân emetsenŋe pitu otmu hânân senŋe âlâlâ ya kerehâk sem gulip tuhuwuap. Yakât kakŋan yâhâpŋe sâmu hân himbim aŋgo tetewuap. Hân himbim aŋgo tetemu yan mem katyekmu koko salehâk manŋetâ yekmu ârândânŋ otbuap. Yakât pat emelâk kuyingimu tap. Yakât otmâ sâp pato tetemu Kiristoŋe âwurem ge meyekbuap yakât nâŋgâm biwi nâŋgân nâŋgânyenŋe kilik kilik sâmu mambotbangim mannomai.

¹⁴Yawu mambotbangim mannomai yanâmâ Anitâŋe yekmâ “nine nanne baratne koko salek,” sâŋ kaok nâŋgâyingiwuap. Yakât nâŋgâm Kiristohâlen biwiyenŋe tiŋâk kepeim manmanyenŋe kelihakmu kârihem mannomai. ¹⁵Otmu Anitâŋe Kiristo in yawu ki hâŋgângumu âwurem gewuap. Otmu ki âwurem gewuap yan lohimbiŋe yâkâlen biwiyenŋe kepeinŋetâ Anitâŋe tosayenŋe pilâyingiwuapgât mâtâp ki hâreakmâ tâŋ sâwuap. Yakât nâŋgâm “Wongât Anitâŋe in yawu ki hâŋgângumu gemap?” yeŋe yawu ki sânomai. Den yan yuŋe Pauloŋe den kulemgum katyŋgimu ekbi ya miap. Yakât yuwu sâmune nâŋgâŋet. Anitâhât biwiŋan nâŋgân nâŋgân âlâlâ tatmap ya Wâtŋât mâmâŋahât Heakŋe mem bukunenŋe Paulo yâkât biwiŋan katmu yâkŋe kulemgum katyŋgimu ekbi. ¹⁶Pauloŋe ekap âlâlâ katyŋgiop yan den yuwuâk kulemgum katyŋgiop. Yawu gârâmâ den kulemgum katyŋgiop ya lohimbi nombotŋaŋe sâlikum nâŋgâŋetâ ki keterakyiŋgimu nâŋgân nâŋgânyenŋe hâlim milim otmap. Yakât otmâ den ya kelaŋgatmâ bukulipyenŋe kâsikum yingimai. Yawu gârâmâ emelâk Anitâhât

poropetelipŋe otmu lok nombotŋaŋe yâkât den kulenguwi ya yâkŋak yawuâk kelaŋgatmâ bukulipyenŋe kâsikum yinŋimai. Yakât otmâ yeŋahâk otmâ tâpikgum hiliwahonomaihât pat mansai.

¹⁷Den yu emet inânŋan ekyongoan. Lok nombotŋaŋe Anitâhât den kum yeŋe eŋgatyenŋeâk watmai. Lok yawuyaŋe yeŋgâlen taka eŋgatyenŋan geŋetâ nânŋân nânŋânyenŋe hâlim milim otmu manman bâleŋahât paŋgoŋân kioŋmaihât biwiyenŋe galemahom mannomai. ¹⁸Otmu sâp yiwereŋe yuâmâ Kutdânenŋe Yesu Kiristohâlen biwiyenŋaŋe kepeim manmai ya wangim yâkâlen biwiyenŋaŋe tiŋâk kepeim yâkât den tiŋâk lâum mannomai. Yawu otnomai yanâmâ yâkŋe tihityenŋe otmu manman âleŋahât bulâŋe yeŋgâlen teteap ya wangim bulâŋe topŋe topŋe teteyiŋgiwuap. Yakât nânŋâm Kiristo mepaem manmâ yâhâmbisâin. Ya bonŋanâk.

Nâ bukuyenŋe,
Petoro